

信共欺其上貢非其人亂天儀汗列宿天疾之地怨之國君惡之聖賢非之是為世大佞妄語之子當坐是事不得天地鬼神誅則人當害之辱其先人禍及妻子後生是四大凶也犯四大凶貢非其人也乃使帝王愁苦治雲亂凡害氣動起不可禁止前後不理更相承負天地大怒群神戰聞六方不喜八達乖錯終古不理天上名是為曰減年短命之符何故名是為短命之符哉然治當長反為其短年當多反為其少舉事逢凶無益於身天地不悅除算減年故天上名為短命之符也善哉善哉愚生聞命矣然子可謂口口知之矣慎此天文以示德君以示凡賢下及民賢為人上求士不可不詳為人下貢士不可不忠後世傳詳誦此書文結於習心中急舉士不若此天地不復喜也知而故為其過重戾真人慎之唯唯誠受教不敢犯禁忌餘力行子可謂慎事得天命矣

右天地手策貢士四吉凶短命符續命符安國得天地心群神喜識

太平經卷之一百九

正一天師清微弟子 洪百堅 製作
道教學術資訊網站

太平經卷之一百一十 三
大功益年書出歲月戒第一百七十
九
惟上古之道修身正己不敢犯神靈之所記
逆敢求生索活於天君不敢自恣恐不全日
念生意與神為臣表其類也欲得盡忠直之
言與諸所部主者之神各各分明是非逆敢
信理曲直耳何日有忘須臾之間上有占人
具知是非何所隱匿何所有不信者也故得
自理求念本根未曾有小不善之界也但自
惜得為人依仰元氣使得蠕動之物所不親
見災異之屬但人負信於誓言兩不相信故
有所不安天地中和上下各自有信人不得
知其要而言何獨有善有惡耶災異悉所從
生人食五常之氣無所不稟無所不依無所
不行獨何不奉知古有知人相及遠乎此為
失善從惡令命不全何獨而是耶故天君言
有善有惡善可令同所以然者當令有分別
不可自從善當上行惡當見刑何得與善相
及耶以人意言之亦為可知自有當直之者

故設惡以分明天地四時五行之意使知成
生為重增其命年人得生成之道承用其禁
不敢觸忌以是言之天知愚人甚薄而無報
復之意逆天所施為證天所施為加人所施
行邪中類反當活惡疾善也故聖人知陰陽
之會賢人理其曲直解其未知使各自知分
畫不相怨善自命長惡自命短何可所疑所
怨乎人人為不如六畜飛鳥走獸水中物耶
以為人無狀邪天使然也天同欲使為善耳
不欲令為惡也如善惡同其苦樂耳富貴壽
老天在上為不能分別好醜使無知人得氣
揚聲言我與汝曹等耳行善何至用是故進
益善令久生其人薄者念之等耳比惡亡命
迺欲正悔過見善與從事見惡退止日夜剋
躬思省所負既復小生得與人等雖不仙度
可竟所受不中亡年是為可矣俗人之所長
須更耳不念久生可上及知士有心念索生
故不作惡耳天見其善使可安為更求富者
子孫雖不盡得尚有所望何為作惡久滅亡
自以當可竟年不知天遣神往記之過無大

小天皆知之簿疏善惡之籍歲月拘校前
後除算減年其惡不止便見鬼門地神召問
其所為辭語同不同復苦鬼治之治後乃服
上名命曹上對算盡當入土愁流後生是非
惡所致邪人何為不欲生乎人無所照見乃
如是何所怨欲乎同十月之子獨何為不善
施惡不息安得久乎惡士之計壹何不與小
善合乎行復道小不急之事凡人所為各不
同計自以為可所觸所犯皆欲得人利人亦
不欲利之善利得生須更惡利不久以善不
久居地上也故使有天地知不乎天使人為
善故生之而反為惡故使主惡之鬼久隨之
不解有解不止餘鬼上之輒生其事故使隨
人不置也知不乎此書先進善退惡古今文
也自不從其長命就惡無可奈何鬼使得不
白也故有過者沒形於土耳精神不安未知
所止是誰過乎人行且自詳思念取便安勿
非所言辭語前後復重其所道非一事故重
耳人命近在汝身何為叩心仰呼天乎有身
不自清當清誰乎有身不自愛當愛誰乎有

身不自成當成誰乎有身不自念當念誰乎
有身不自責當責誰乎復思此言無怨鬼神
見善白善見惡白惡皆不同也復知之乎辭
小止有惡不息文書不絕人改過止此戒可
知為惡自負其身耳不負他人也復知之乎
行順所言可思無離於心離之為敗不可復
理與鬼同任何得活乎念生得生是為知惡
會當盡不得久在知之不乎行復小說人居
天地之間皆得為人奈何忘天地恩乎此為
何等哉其愚乃如是不能改何所復望乎欲
望天報當自責懇惻垂淚而行言我蒙恩得
為人與萬物絕殊天使有異能言能語見好
醜知善惡可不之事當自詳慎所言及天辭
令不奉順是為大逆不道之人天安從得久
與從事乎故置凶神古觀之還辭如所言其
人自不好善天君言前已有文書不絕部主
者下收其魂骨肉付地主不須時惡人不可
數聞故自損威怒還就儒雅改易其惡來取
衆善著之於內以心置心神言我受天心教
勅使主隨人心其不得有小脫善惡輒有傍

神復得心神言益復悲楚未知吉凶故自恐在惡任之部日夜自惟不知當所自置故不敢有不善之意唯諸神相假借使得自責不用神誠被誅不恨天君遣大神下言此人有自責悔過不犯所禁假之假之後有不善取之未晚見神言日夜長息恐身過未悉除久不與太陽氣通而在死任之部益復篤不知而何也受勅未能通達靜於閑處自省責過所負以謝天地四時五行諸所部神天君聆聽令自思惟上古之人皆有知慮不敢犯禁自修自正恐見有失動輒為不承命失其年用是之故不敢小解過輒有罰首以是自省自愛敬重禁忌不敢有違失意復見責問心常恐悻悻然失氣負天心言有小不稱是為文煩輒考問實核所言所信可以得名譽及其身無信久亡人年故復思念不失我心切懼恐怖不敢自安舍氣而行常自懸慕貪與天地四時五行共承統而行不敢有小過羞心自念當前後深知至意不失其常念思不違精實貪生望活何有小惡聞上乎結軀

行相承事何敢有解意恐不能得上至意不知如何也心益復悻切自安無益天壽難得一失不可復還遠俗日久而反中折當顧望下是令悵然故自救惶慄而已常恐一旦大小不稱見退愁懣在心自責自過既蒙天恩得展舒前命飢渴之情不敢忘得活而已諸大神哀省錄示元元稟氣於天府駕乘天氣而行薄所主防禁衆多不可有失亡身雖鄙賤不足榮寵亦不以不肖故能見嫌疑也真以心求進索生唯大神原省語言使見四時五行生成復見日月難報想不見中棄正營之人不敢自遠傾倒枕席大神言此人自師化迺如是何憂無蒙係者邪往昔有是人天右哀之近在左右今見在視事久遠多知慮所言所語無不得天君腹心者且為之為生伏地泣出而言被勅覺寤迺以先古有心忠誠進在所知無不包懷聞之何敢比望先之人乎大神言持是有信之人相語者欲令相生為行比望耳人有不及時生言大神乃開導大分明生等比衆多獨見異使有關思是

恩極重何時教大神乎大神言思從中出發憤念之為報生言自分不知所奉上雖自天有珍奇可好者思復上之見勅發憤想念是為可誠受是言非口辭相報有文也誠日夜惟思不敢有解大神言所誠衆多所諫亦非一人所問持是久遠相語者誠重生耳言特見厚哀尤深天君聞之呼大神曰比生何從發起自致大神異語乎大神言見此學人尤信故為道難易天君言見善進之使及是是宜也大神言天君召問是信生言言不敢希望及天左側也願在無職之處自力盡忠而已大神言皆當有所部主乃見信理如是誠僥倖甚得大分不敢有小不稱者也大神言是生見化乃如是宜且復進可及先古生言不敢進長壽也其人所貪也大神言是天願生言是本因大神所保不敢失大神之戒也天君知此二人相諫勅尤深善之使自相教也惟上古聖人之為道也乃出自然心知天上之治所施行皆豫知者音聲徹道還知形容

自視心昭然意解知當救之事吉凶之會了
然可知心內欣然乃知得天之福也使見前
行之事皆成篤達自惟蒙恩見寵遇得與諸
六神相持日久輒見教戒使不危闕望四表
上下通洞益復衰衰心中歡然復得近期并
及所不聞是皆天大神恩力所施化大神言
是諸神共知進者有命錄籍有真未生豫著
其人歲月日時在長壽之曹年數且升乃施
名各通在北極真人主之變易骨體身輕潤
澤生光時暮得藥以成精華所在化為無不
成出竄入冥絲髮之間何所不通聖人言實
有是從俗成食從地陰神出安得不重乎易
之為輕乃是易大神恩不能報功大施想
大恩忍不及使得蘇息之間深厚非辭所報
大神言是天稟人命祿相當宜非大神意所
施為見善薦之是神福也何所報謝乎恐其
後有疑為施禁固者使聖知教戒後人照知
之耳聖人自有知無所勅也聖人言已得被
報雖生錄籍會當有教導不及大神言是生
之語儻然謙者是其宜也生重見辭前後悉

倘唯大神以成就恩意生見人分人也而不
敢自解而有驕慢也請復於閑靜之處神力
大神所教施願念不違之生大神言盡辭前
後可知餘無所戒也辭別各宜照所言生言
受戒之日不敢解止須臾也但恐未能幸竟
之耳唯蒙扶持使得視息復生望傾側在心
唯大神時時相存教勅是恩不小大神言是
生之所言宜稱之生言唯唯不敢以身自防
大神言成名之人精進有益兼并部主非一
天君聞之大神戒聖人相對辭語為有知之
人宜勿忽解命可至無咎之書各還就所部
見善當進之大神聖人言俱受天君教盡力
有效有敢不敢倦時也天君言成人者為自
成唯唯
惟上古得道之人亦曰法度未生有錄籍錄
籍在長壽之文須年月日當斗之時傳在中
極中極一名崑崙輦部主者往錄其人姓名
不得有脫數使往動搖支節屈申轉傾反覆
教戒勅隨神屈折以集飲之骨節開錄雖不
時相見者知其可堅與不也示之志不傾也

貪生惡也思行天上之神數使往實核有歲
數乃令拜受不足之文心言出辭使知所行
防禁傳示學者不用神文言自己齋書且竟
神乃知相對語言亦連歲月積千三百二十
日乃將與俱見大神通元氣行自然天君薄
見密勅所禁行不得有私相信感心易意行
無失誤大神言已算計諸神所假靈常以八
月晦日錄諸山海陵池通水河梁淮濟江湖
所受出入之簿各分明天君有所勞賜有簿
署天君前自復數通藏金室署有心之人令
主天君所問輒當承所教宜日夜不解屬主
室之人勿失所索部別令可知應得有之心
人須以定錄簿當有使神主為計名諸當上
下先時百日皆文上勿有失脫如有文書不
相應計曹不舉者并坐先勅令勿犯神書言
此書出後三歲八月乃示俗人如有道信文
者大可示之天君有教言此人先時有崇負
勅神為解除收藏未藏者為藏之大神言此
人貧厄空虛日久恐不自全得天君腹心乃
令神收藏不藏者其主未藏者時恐不如所

言也前乞勅拜謝受恩雖日月未至諸先時一月令知之天君言下所部神將士衆田地中勿失時以藏為作姓名令地主敬慎使有神靈往來有欲從願所求聽之有信之後宜慎之大神言如是必海內聞知好道之人將相扶承事之敬之天君言有功之人亦自當見敬大神言此人年未滿期未至請至期教其所報謝當時未昇其舍空虛無以白衣有遺者給食至時止天君言是小事耳以天官給家有家有心者大神言請如所道勅天官給所當得此人空虛日久與食令足大神言令勅天官神給姓名勿令空乏天君言善惟上古之人皆得天報應有信可成乃令受命為神所護視恐有毀缺日夜占之見為善助其歡悅不欲聞其惡常置長壽之曹心使為善無有惡時使有進善有孝忠順之意所承所行不敢以意承教而行人謂無知我亦見知之人有善大恩有哀以思力自喜加人久見狐疑尤惡先没用是自損度自約恐犯惡人日夜惶懼不知如何也天生人知善惡

行善有信天不欲令有惡聞也用是欲貪生惡死亦不敢犯禁如所妨害於身也故因緣天氣得與通人之辭語言自往來知人情意見其不善而退自責恐有文書汗名存其中也如人當時意加施於人誠不敢對首理委曲得自責所施行不得人意過多難除故人來悔易勢當時鋒通以為命可再得也不意天遣大神占之尤惡先入土用是自慙隱忍不敢當惡格辭有小異意既得天恩假其項史使得蘇息長有活之望是天之部分也以故得有分意命不久存用是之故復益悵然有慚愧之心欲見天神求哀教戒照未知之事防備未來當與天心合可得小如意貪上有計慮之人并思善惡得不見之勅逆見大神苦甘自道生求俗之人貪及上以故自修自正唯大神勅屬其不足使覺寤望戒左側唯大神哀省索生之人大神言何惜禁戒乎想自深知之辭令各自吐寫情實但恐不如所言且復誦之計從心出宜復熟念生言皆感恐既身及之何敢不從心出乎大神言如

是為發且復還靜處惟思之有不足乃求生言稟知希疎少未得大通著之戒也旬旬須教乃敢進見大神言如欲盡精誠有功可得及之努力自念從生以來功效所進解先人承負承負除解過盡亦當上何所疑也且復慎所言宜勿外意也生言受勅見戒不敢餘力而不進善也已善復惡自與命戲耳大神言善人也宜復屈意雖心禁命之日當時微苦用心不解復得福生受勅歸闕靜處思失自責大神言思從中出天神知之勿倦也生以年窮盡乃止大神言有行乃如是何憂不前乎天君聞之重勅大神使欲進者觀其所為積歲月日各令有部有功當上名須缺補上古之人心言口語皆知人情無文而治表裏外內具見其信各不相負天有要令犯者尤醜輒見治問責其過發用是之故益復悸動惻然念天恩所施行使得全完為人知好惡之義人以此等念恩深厚不知以何報之但心思欲進而有忠誠之信所為所作承奉不敢失小差恐為衆神所白見過於上

有不竟年命之壽以是益復感傷憂心不敢自解而望報施之意實貪生與諸天神共承天心有善者財小過除竟其年耳如有大功增命益年承事元氣精華照見所知復受大恩非辭所報但獨心不知如何也唯諸大神共省哀錄不及教戒使見知慮知天上所施禁忌衆多當輒相承不得有失也唯大神惟其不足見戒不敢忘大分受施不忘生恩意也大神言生自有知之人何所教勅但當順天所為勿逆其心見勅戒應時奉行勿失脫而已是為得天心意矣賞罰有輕重宜各實之勿有失誤得為可餘少所戒宜詳慎所言出辭當諦思之令可行有小安者輒以心自況之從善是為小戒餘者當平生之言見深戒不有失神意也自惜童蒙未見大分故固大神重戒所照衆多知慮廣博無所不包唯大神重戒欲蒙其德不逆所言唯復顧慮伏須重戒大神言是語可知天上之施與中知地下傍行等耳法律相應無有差也自有相教者且隨其主勿逆而已生言自分當戒

也法律雖同而用心少得其意也天心難知其訣大神言是皆實無欺而已乃豫知天君意所施為者為上第一之人可在天君左側有功勞賜賞謙遜不敢盡受益復竭盡筋力用心已容為大故天君重復自面勅教人是生之福也所主衆多平心為行是自可矣生言不敢乃望在天君左側也見活而已但思忠孝順理盡節不敢受重賜但恐無功耳如小功效之日令生身日明長見生日久矣但思無極不敢有不思過須臾也得見温言心志飽滿大神與生同居對治無思也誠復受恩出入上下時小相戒是大神之恩不可中謝但心意惡慕常在心中不敢解止天君聞之知之士所行莫不得願也常能自責過言想不中惡勅大神教戒之使及上勿倦也上善之人皆生於自然皆有曆紀著善籍之文名之為善人之籍常有善人之行未嘗有惡稱行止出入輒聞善意未嘗有惡故名善人動輒進之於人衆奇為不見之物得上於尊尊者見之或善其言或貪其善行或貪其誠

或貪其見愛或貪其孝忠或貪其久所言或亦貪其見信是善之善也故名之為善時見寵榮復貪得長遊復貪得神仙復貪得不死位復貪使衆神是善人之貪也行仰善與天地四時五行合信諸神相愛有知相教有奇文異策相與見空缺相薦相保有小有異言相諫正有珍奇相遺共進於天神欲見敬求戒思過恐有不稱天之大神也常日夜進心念篤見善從心思聞善言忠直之志完軀之人愛其命年常恐一朝有異小不善之意聞人有過助其自悔主其有知善所諫用其人言并見其榮善教戒人求生索活之道是善人之極但當有功不敢違神之願思慕長在復得行見人之願所當逮及唯天大神通達辭令檢勅所行防禁得小失相假忍使思其意天恩廣大所愛傷使得自思悔過命長是大分之施也但恐不而卒竟恩貸唯諸大神原其不及願蒙不見之戒使得思樂其志廣見唯思重勅大神言上天地各有文理知用前不知自却此自然耳不惜愛戒而不相

教也見衆善之人無有疑何所復戒但且詳念所言相副而已是善人之願也宜復明之生言自不肖行不純質以故自親大神所禁戒者數蒙厚遇輒見思念願見以故復詣不知厭足天使其然大神言是生受自然之姿天使來問者知其同不耳何所嫌疑乎容欲來承勅者皆言自情實少獲辭語出於華耳會以心自正者少故使有空缺轉補是生短也宜復慎之勿解也生言稟性遲鈍設意不夫但以文自防也唯哀之不耳大神言是亦出於知知善行善知信行信知忠行忠知順行順知孝行孝惡無從得復前也想必生自知是故重之耳生誠悵然曰是生所聞是大善是有重戒出其中大神所道乃如是何敢有懈慢之意乎是為活生之意蒙寵如是不知何所用報大神恩也大神言是曹事視之而不足為戒念可行宜復成名可及上無疑行自得之何所報謝乎辭令自善不得相聞語耳生言是戒使生長得有活之望請於無知之處思惟所言大神言當知生辭勿難於內

也前後所戒來學問之人如此矣生言誰當肯相勅如此乎生祿命大神喜之時約勅前後備足但無以副恩誠慚無以自置天君聞之是善之善善中尤善可兼行諸部勿使有失大神還語生天君所勅恩榮如是宜勿犯之唯唯上德之人乃與天地之間當化成之事使各如願善者著善之文不失其常不失其宜是為上德無所不成無所不就其明不失其實不失陰陽所生成不失四時主生之氣所出入不失五行之成不失日月星宿不失其度數不失吉凶之期不失有災異之變不失水旱之紀人命短長不失所稟繫星宿厚薄之意是上德所當行也故言有德之人無所不照無所不見上下中和各從其宜就其德各不失其名是為順常長生之文莫不被榮萬物巖牙部甲而生垂枝布葉以當衣裳霧露霜雪時雨以當飲食生長自成覆葉實令給人地之長名為水母民名為瓜盛夏熱時以當水漿天下所仰人無大小皆食之是德人承天統成天形於地以給民食

行恩布施無不被德以自飽滿是天恩非也天所施生甚大不順命反言自然是為逆耳故使德人上知天意教民作法無失天心有養長大使得為人復知文理行成德就可上及天士天上之事功勞有差德人主知地之事令民依仰重見恩施不能以時報之德人為天行氣上下中央不得其所者人反輕天所施為是正令天怒不止神靈不愛人侵奪年命反自怨非天是愚甚劇故下神書使佳勅為施禁固既民不犯有豫知來事遠惡趣善不犯所禁復得見天道所師化無不從之化者故使人主為作羽翼開導頭尾成其所為城郭倬然可知知上及大化并理元氣復知人事是亦有祿有命之人皆先知之隨人化可得延之期天亦愛之善神隨護使不中惡心使見善惡者不得以為比等故天重善使得從願不侵不剋如其平殊能過善天復增其命年不危陷是非大恩也當報何疑前有大善所行合天心意近之左側惡氣不來不敢視之延命無窮是恩難報報之不以珍

奇但寫心歸誠自實有信不負所言是為有報為報為知不乎知善為善見信行信是人所長也且宜照之勿自疑前有信人已壽無極化為神靈所兼備足功勞所致復知之乎故德人有知之士所得上進天甚愛之不其文章知命不怨天行各自慎勿非有邪教人為善復得天心意者命自長事皆天君出不得留止俗人難化化之以漸無有卒暴詳慎所言勿為神所記各慎所部文書簿領自有期度勿相踰越見善進之見惡當改勿有所疑貪生之人自不忘天所施為故重之者誠愛人之命耳念善得善壽不疑也天君愛信知不乎詳慎神文勿以自試天下之事孝忠誠信為大故勿得自故恣復奪人算不得久長慎之慎之勿懈也懈為自疑耳疑之自令不令知不乎知不乎

右天上文解六極大集天上八月校書象天地法以除災害

太平經卷之一百一十

太平經卷之一百一十一
 大聖上章訣第一百八十
 惟始大聖德之人乃承元氣自然精光相感動乃為大聖悉知當所施輒如天意不失其元氣之志常行上為大神輔相如國有公卿心知大神之指歷文書相通上章各有薦舉宜得其人使可保有言事輒用天君以事更明堂得書輒下無失期輒得朝上之恩貸自天君曰不詠朝廷皆請寄之人文書所上皆自平均無有怨訟者各自身受恩分賞罰有差何有分事者乎大聖先知天君所當施行之事安得有失乎俗人不知以為如民長吏安能知詔書所當道下文乎天上之事音聲遙相聞安得有隱也此在自然之中相檢何有脫時乎天君日夜預知天上地下中和之間大小乙密事悉自知之諸神何得自在乎故記首尾善惡使神疏記天君親隨月建斗綱傳治不失常意皆修正不敢犯之故言天遣心神在人腹中與天遙相見音聲相聞安得不知人民善惡乎天君言善信舉之惡無

信下之不但天上欲得善信人也中和地下亦然人不深知當來之事故使有心志之久與大神同路是天之所近比如國有忠臣良吏不離左側但人自不信天天何時當信有二心之人乎中不為天不如民人邪蟲蟻之人亦何因緣得天心意所壽貪惜此人不時相親者過起於民收攝十三於後亦有歲數見有心之人不念俗事貪進求生故神告其心出之耳有心志之人可與從事對談誠信之無有心志念眾口當食求利衣溫飯飽禮費相隨驅使貧弱自以高明非天腹心也行不純質復欲求道索久生是正為索所不得罪大重少有貴時此為知不乎當白日昇上之人求生有籍著文北極天君內簿有數通無有心志之人何因緣得著錄有姓名乎

種學之人學之得天腹心者可竟天年殊能思盡力有功効者轉死籍之文復得小生何時當得駕乘精氣為天行事是為可知得書感心泣出自責言我同十月之子施行獨不得上心意而在死伍之中是行何一不得